

ԳԵՈՐԳ ՏԵՐ-ՎԱՐԴԱՆՅԱՆ

**ՎԵՆԵՏԻԿԻ ՄԽԻԹԱՐՅԱՆ ՄԻԱԲԱՆՈՒԹՅԱՆ
ԸՆԴՀԱՆՈՒՐ ԱԲԲԱՀԱՅՐ Հ. ՍԱՀԱԿ ՃԵՄՃԵՄՅԱՆ՝
ՃԳՆԱԿՅԱՅ ՎԱՆԱԿԱՆ-ԳԻՏՆԱԿԱՆԸ
(1939-1996)**

Մեծն Ավետիք Իսահակյանը 1930-ական թթ. Միխիթարյան միաբանության Վենետիկի ճյուղի մասին շատ դիպուկ նկատել է. 230-ամյա պատմության ընթացքում միաբանությունն ունեցել է շուրջ 300 անդամ, որոնցից միայն 30-50-ն են առավել նշանակալի հետք թողել մեր գիտության, կրթության ու մշակույթի ասպարեզներում. նույն ասպարեզների գործիչ-անհատականություններ միաբանությունը միաժամանակ միշտ ունեցել է 2-3 հոգուց ո՛չ ավելի և խոսքն ավարտում է նրանով, որ այդ օրերին ևս միաբանության վենետիկյան ճյուղն ունի գործող երկու ցայտուն անհատականություն՝ Հ. Վարդյան Հացունի և Հ. Արսեն Ղազիկյան: Վերջինիս հոբելյանն էր այդ օրերին և որին էլ նվիրված էր բանատեղծի զմահատանքի խոսքը:



Նրա նկատած օրինաչափությունը գործում է նաև մեր ժամանակներում. կրկին 2-3 մարդ, որոնց ամեն ճոր հրապարակումը մշակակալի իրադարձություն է հայագիտության համար: Եվ, որ ամենացավալին է, այս շարադրանքը նրանցից ամենաերիտասարդին՝ Հայր Սահակ վարդապետ Շեմճեմյանին վերաբերող հիշատակի խոսք է: Անտարկելի ճշմարտություն է, որ ցանկացած երևույթի կամ անհատի վերջնական ու ճշգրիտ գնահատականը տալիս է ժամանակը, բայց նույնչափ էլ անկասկած է, որ երբեմն անհատի գործի արժեքն աներկբայելի է լինում հենց հեղինակի կենդանության օրոք: Այսպես է նաև Հ. Սահակի պարագան. մեկը մյուսից կարևոր, արժեքավոր ու սպասված նրա աշխատությունները հերթով լուծում էին մեր պատմության ու բանասիրության էական շատ խնդիրներ:

Ծով մյուսի տեղյակ՝ փաստաւեր գիտնականն ամենայն սիրով բավարարում էր հայաստանցի շատ հայագետների հարցասիրությունը. շատ արժեքավոր նամակագրություն ուներ արժանահիշատակ և հանրահայտ ակադեմիկոս Լևոն Խաչիկյանի հետ (միշտ և անվերապահ հարգանքով էր հիշում նրան). մեծամուն Հակոբ Ամասյանի դիվանի մեջ ևս շատ են «Հ. Սահակ» ստորագրությունն ունեցող՝ գիտական մեծ արժեք ունեցող նամակները: Նրա հետ մեր բարեկամությունը նույնպես սկսվել է նամակագրությամբ. ունեցածս բոլոր գրությունները ճառագում են անսահման բարությանք ու պատրաստակամությամբ:

Երբ 1996 թ. հունիսի 23-ին ստացանք նրա՝ վեներտիկի Մխիթարյան միաբանության ընդհանուր արքաճայր ընտրվելու լուրը, ուրախության հետ ունեցանք նաև մտավախությունը՝ թե վարչական աշխատանքը կարող է գիտությանը ժամանակ չթողնել: Ո՞ւմ մտքով կանցներ, որ դարանակալ հիվանդությունը հագիվ երեքուկես ամսվա կյանք է թողել տիպար հոգևորականին և քազմարդյուն գիտնականին:

Հ. Սահակ Մեմենյանը (ավագանի անուճով՝ կարապետ) ծնվել է 1939 թ. մարտի 5-ին, Հալեպում. նախնական ուսումն ստացել է Դամասկոսում, 1952 թ. մեկնել վեներտիկ և ուսումնառությունը շարունակել Մխիթարյան միաբանության ժառանգավորաց վարժարանում, ապա՝ Հոմսի Հիսուսյան միաբանության միջազգային Գրիգորյան համալսարանում: Կուսակրոն արեղա է ձեռնադրվել 1964 թ. մարտի 29-ին, 1991 թ. ծայրագույն վարդապետի գավազան ստացել Մխիթարյան միաբանության ընդհանուր արքաճայր Հ. Գեորգ վ. Պայլանից: Կարևոր և պատասխանատու պաշտոններ է վարել հիմնականում Մխիթարյան մայրավանքում՝ Ս. Ղազարում, երկար տարիներ վարել է միաբանության փոքր (Ս. Ղազար), ապա՝ մեծ (Հոմս) ժառանգավորների խնամատարությունը, 1985-1990 թթ. «Բազմավեպ»-ի խմբագիրն էր, 1991-1996 թթ.՝ Մխիթարյան միաբանության ընդհանուր աթոռակալը (արքաճայր տեղապահը):

Օտտ ուշագրավ է թե՛ հոգևորական և թե՛ գիտնական դառնալու նրա ճանապարհը. քազմանդամ ընտանիքի արհեստավոր հայրն ընթերցասեր որդու կրթության վարձ վճարել չէր կարող, ուղարկեց Ս. Ղազարի ժառանգավորաց վարժարան. Մխիթարյան առիցքնող միջավայրն առմիշտ գրավեց պատանուն, և նա մի քանի տարի հետո հորը գրեց. «Այստեղ շատ-շատ ձեռագրեր և գրքեր կան, բոլորը պետք է կարդամ»: Եվ սկսեց կարդալ. սկզբում նրան հետաքրքրում էր ազգային ծիսագիտությունը. նախ ուսումնասիրեց և հրատարակեց Մաշտոց ժողովածուի «Մկրտություն» կանոնի քննական քննադիրը, հետագայում իր աշակերտներին հանձնարարում էր նույն ժողովածուի «Նշանտուքի», «Պսակի» և այլ կանոններ. մտադիր էր հրատարակելու Ծարակնոցի նախաշնորհայիական քննադիրը և մինչև վերջ հետամուտ էր այս նպատակին:

Սակայն իր վանքը, միաբանությունն ու նրա առօրյա անելիքը համարում էր իր հոգսը. ականատես ենք՝ արդեն հսկա վաստակի տեր գիտնականն ամեն օր՝ ժամը 3-ին, ձեռքերն ագուցած, վանքի մուտքի մոտ դիմավորում էր այցելուների խմբերին, երկուսուկես ժամ համբերությամբ պատեցնում վանքում և անձանձրույթ քացատրում քառացիորեն ամեն ինչ՝ «Հատակի այս խճանկարը Մխիթար արքաճայրն իր ձեռքով է պատրաստել, իսկ այս մեկը՝ աշակերտների հետ»: Այս մտահոգությամբ էլ տքնաջան ու երկարատև աշխատանքով՝ բոլոր թերթիկները մեկիկ-մեկիկ կարդալով, խնամելով ու կարգավորելով, մշակեց և քարտագրեց վանքի երեքդարյա՝ անխնամ մնացած դիվանը: Սրա շնորհիվ կարողացավ շարունակել և մեծադիր մի քանի մատյանի տեսքով մեր օրերին հասցնել վանքի «Ժամանակագրությունը», որ սկսել և 1800 թվական էր հասցրել Հ. Մկրտիչ Ավգերյանը:

Տքնանքով ստացած նույն գիտելիքների ու իմացությունների ուժով գրեց իր մեծարժեք աշխատությունների մեծ մասը. «Հայր Ներսես Սարգիսեանի ուղեւորութիւնը դէպի Փոքր եւ Մեծ Հայք (1843-1853)», վեներտիկ, 1974. «Արա-

համ երեսանցի, Պատմություն պատերազմացն 1721-1736 թուի», Վենետիկ, 1977 (ուսումնասիրություն, հեղինակային և խմբագիր քննադրերի հրատարակություն)։ «Հ. Ղետնդ Ալիշան տեսուչ Փարիզի Մուրատեան վարժարանի (1858-1861)», Վենետիկ, 1980. «Մխիթար արքեպիսկոպոս հրատարակչական առաքելությունը», Վենետիկ, 1980 (կոթողային ամփոփ ուսումնասիրություն)։ «Քարտիսագիտութեան դպրոց վր Ս. Ղազարի մէջ ԺԸ դարուն», Վենետիկ, 1981. «Հ. Միքայել Չամչեան եւ իր Հայոց պատմությունը», Վենետիկ, 1983. «Գեորգ դպիր Տեր-Յովհաննիսեան (Պայատեցի) եւ Մխիթարեանները», Վենետիկ, 1984. «Նոր միջեր Սարգիս արքեպս. Սարաֆեանի մասին», Վենետիկ, 1985. «Յովհաննէս Պատկերահան (1695-1758)», Վենետիկ, 1987. «Յովհաննէս Պատկերահան. Նամականի (1695-1758)», Վենետիկ, 1988 և այլն։

Հիմնականում մայրավանքում պաշտոնավարած լինելով հանդերձ, չորս տարի «հայրություն» էր անում Հոռմում համալսարանական կրթություն ստացող ժառանգավորներին. առօրյա կազմկերպական հոգսերից ազատ թուր վայրկյաններն անց էր կացնում Հավատաստիյոտի (Պրոպագանդա) դիվանում. մեկ առ մեկ նայել է դիվանական հարյուրավոր ծավալուն հատորներ, քարտագրել ու քաղազրել բազմաթիվ հարցերի պատասխանող ու խնդիրներ լուծող փաստաթղթեր։ Առիթ ենք ունեցել թերթերու չորսամյա աշխատանքի այդ հսկա արդյունքը և համոզվելու, որ տասնյակ ուսումնասիրությունների մյուս էր ամբարել, ուստի և ցավով արձանագրում ենք, որ հասցրեց տպագրել միայն երկու փաստալից գործ. «Մարտիրոս հայ տպարանը», Վենետիկ, 1987. «Հայ տպագրությունը և Հոռմ (ԺԸ դար)», Վենետիկ, 1989։

Հ. Սահակի խմբագրման տարիներին (1985-1990) 150-ամյա «հազմավչայ»-ը ամենայրուջ գիտական նկարագիր ստացավ (անգամ՝ ոմանք դժգոհում էին, թե գրական նյութեր չունի). այս տարիներին բացառապես իր աշխատանքի ու ջանքերի շնորհիվ ավարտում տեսքի բերվեցին և հրատարակվեցին կարապետ եպս. Ամատունու թերի մնացած որոշ գործերը. «ԺԸ դարու երևելի վարդապետներ», Վենետիկ, 1989. «Մովսէս Գ Տաթևացի կաթողիկոս Էջմիածնի», Վենետիկ, 1992։ Մեր օրերի իրադարձություններին արձագանքեց անմիջապես՝ Ղ. Ալիշանի «Հայաստանի տեղագրություն»-ը տպագրել սկսելով «Արցախ» և «Ուտիք» մասերից։

Ուներ նաև խորունկ, աներկբա և անայլայլ հավատ, որի թելադրանքով էլ հրատարակել է տասնյակ գրքեր՝ «Մանչնայ Բրիստոսը աղօթքի կեանքով» (1995), «Աւետարանական երանություններ» (1996) և այլն։

Կարևորությունը գիտակցելով, վերջին տարիներին ամմնացորդ նվիրվել էր միաբանության ձեռագրական ընտիր հավաքածուի ցուցակագրման ծանր աշխատանքին, որով և կերտեց իր կյանքի հուշարձանը. 1993-1996 թթ. տպագրեց «Մայր ցուցակ հայերէն ձեռագրաց մատենադարանին Մխիթարեանց ի Վենետիկ» կոթողային հրատարակության Դ-Ջ հատորները՝ 2054 մեծադիր էջ, որոնք ընդգրկում են շուրջ 750 ձեռագրի նկարագրություն. նաև ավարտել է է հատորը (170 ձեռագիր), պատրաստել՝ Ը հատորի կեսը, մտադիր էր ամբողջ հավաքածուի (շուրջ 3500 ձեռագիր) պարունակությունը հայագիտության սեփականությունը դարձնելու՝ նկարագրությունը Թ հատորով ավարտելով։

Պակաս կարևոր չէ նաև այն, որ իր հատորների սկզբում տպագրեց հավաքածուի ստեղծման պատմությունը՝ քայլ առ քայլ, անհատ առ անհատ ներկայացնելով այն ջանքերը, որով միաբանությունը հետևողաբար ժողովել է իր

ձեռագրական ընտրելագույն հավաքածուն (հանձնի՝ անվերապահ կորստից փրկելով իսկապես անփոխարինելի արժեքներ): Այս շարադրանքի մեջ աչքի է զարնում իր «ընտանիքի» միաբանության նկատմամբ ունեցած սերն ու անվերապահ նվիրումը. երկու-երեք դար առաջ կատարվածի մասին կարող է գրել. «մեք ձեռագիրն ստացած ենք», «մերիցները բերած են», «նուիրած են մեզի» և այլն. ակնհայտ է իր նախորդների հետ ունեցած կենդանի հոգեկան կապը՝ Մխիթարի և մխիթարյան ոգին:

Ձեռագրացուցակի մեր գրախոսության մեջ (Պատմա-քանասիրական հանդես, 1995, Հմր 2, էջ 245-53) անկեղծորեն գրել էինք. «Եթե միաբանությունն ի վիճակի լիներ իր այս մի անդամին ընծայելու միայն գիտությունը (ինչպես ժամանակին՝ Ալիշանին), ապա նա կուտակած պաշար շատ ունի, հայագիտությանն էլ՝ բազմաթիվ տալիքներ», ապա՝ ավարտել էինք «Վարձքը կատար» սրտաբուխ խոսքով: Այժմ էլ համոզված ենք, որ պատրաստի հատորը շուտափույթ տպագրելը պետք է լինի միաբանության սուրբ պարտականությունը, իսկ կիսատ մնացածը և չարվածը, նույնպես՝ հնարավոր չափով արագ, պետք է ավարտի և հրատարակի Հայր Սահակի շնորհալի աշակերտներից մեկը. միայն սրանով կարելի է կատարել իսկապես ճգնակյաց բազմադրյուն հոգևորական-գիտնականի՝ մեզ հայտնի վերջին ցանկությունը՝ «ինչ ալ ընելու ըլլան, է. Ղ. Թ հատորները լոյս պիտի տեսնին, ամէն տարի հատ մը»:

Սրտի ցավով և դժվարությամբ գրված այս խոսքն ավարտում ենք հիշատակարանային մաղթանքով. «Յիշատակն արդարոց օրհնութեամբ եղիցի»:

